
ВИЛОЯТ ҲОКИМИ ХАЙРУЛЛО БОЗОРОВ КОРЕЯДА ФАРҶОНАЛИК ТАЛАБАЛАР БИЛАН УЧРАШДИ

Вилоят ҳокими Хайрулло Бозоров, 27-30 март кунлари Корея Республикасига ташрифи давомида Сан Мун университетида бўлиб, олийгоҳ раҳбарлари билан учрашди, университетда таҳсил олаётган ўзбекистонлик, хусусан фарғоналик талабалар билан мулоқот ўтказди.

1972 йилда ўз фаолиятини бошлаган, бугунги кунда Кореянинг энг илғор олийгоҳларидан бири бўлган, Дунёнинг 76 та мамлакатидан келган 2000 нафарга яқин хорижлик талабаларга ҳам илм бераётган нуфузли Сан Мун университети президенти Сеон Жу Хван ҳамда университет илмий жамоаси билан ўтказилган учрашувда вилоятимиз иқтисодиёти ва саноат тармоғини ривожлантириш бўйича муҳим вазифаларни ҳал этишга қодир бўлган юқори малакали кадрларни тайёрлашда ҳамкорлик истиқболлари муҳокама қилинди.

Бу борада қўшма дастурларни амалга ошириш, вилоятимизда Сан Мун университети таълим стандартлари асосида кадрлар тайёрлаш, соҳа мутахассислари малакасини Кореяда ошириш, илмий тадқиқотлар олиб бориш борасида ҳамкорлик қилиш, корейлик профессор-ўқитувчиларни Фарғонага жалб қилиш, илмий форумлар ташкил этиб бориш, қўшма тадқиқот ва ишланмаларни йўлга қўйиш каби масалалар юзасидан ҳамкорлик меморандуми имзоланди.

Корея иқтисодий мўжизасининг асосий замирида илм-фанга ва олимларга бўлган юқори эътибор тургани, бугунги кунда Президентимиз бошчиликларида мамлакатимизда амалга оширилаётган ислохотлар жараёнида илм-фан ва таълим ривожини давлат сиёсатининг устувор йўналишига айлангани қайд этилди.

Сан Мун университетининг ҳамкори бўлган Фарғона шаҳридаги Корея халқаро университетида 3+1 қўшма диплом дастури бўйича таҳсил олган талабалардан 112 нафари ҳозирги кунда Сан Мун университетида 4-курсда ўқишмоқда. Умуман олганда эса, Сан Мун университетида 159 нафар ўзбек талабалари билим олишмоқда. Вилоят ҳокими Хайрулло Бозоров, ушбу ёшлар билан узоқ давом этган самимий мулоқот ўтказди. Вилоят раҳбари ёшларга замонавий илмларни эгаллашнинг бугунги ҳаётдаги, қолаверса ҳар бир мамлакат ривожига катта аҳамияти ҳақида ўз фикрларини билдирди. Бугунги кунда вилоятимизда малакали кадрларга бўлган эҳтиёж ҳақида тўхталган вилоят ҳокими, ёшларни ўқишни тамомлагач, вилоятимизга қайтиб, жамият равиёти йўлида хизмат қилишларига умид билдирди.

Талабалар ўзларининг Кореядаги ўқиш ва ҳаёт шароитлари, келгуси режалари борасида ўртоқлашдилар, амалга оширмақчи бўлган лойиҳалари ҳақида вилоят ҳокимига маълумот бериб, уларни ҳаётга тадбиқ этишда маслаҳат ва кўмак сўрадилар. Ҳар бир таклиф ва ташаббусни ўрганиб чиқиш ҳамда ҳаётга тадбиқ этишга кўмаклашиш, ёшларга муносиб иш ўринлари тақдим этиш бўйича учрашувда иштирок этган вилоят масъулларига вазифалар белгиланди.

Мулоқот давомида мамлакатимизда амалга оширилаётган конституциявий ислохотлар ҳамда референдумга қўйилган янги Конституция лойиҳасидаги асосий жиҳатлар юзасидан ҳам фикр алмашилди.

Бизни ижтимоий тармоқларда кузатинг [Facebook](#), [Telegram](#), [Facebook](#), [YouTube](#), [Instagram](#)

2023-03-31 16:42:48